

MERKWAERDIGHE SLITINGHEN

1466—1469.

(Vervolg van bladz. 537).

1466. **W**ant Lutghert, Henric Korstgensz dochter, *two mannen ghetruwet heeft, daerom heeft si opter kaec ghestaen, ende si sel den steen draghen, ende die raet verbiet hoer onse stat eweliken, ende si sel eene mile vander stat bli- ven op hoer lyf (208).*

— Want suster Griet *onse stat verboden was mit- ter clocken, ter tyt toe si die slitinghe voldae- n hadt, die hoer die raet oversteten hadde van- den kermeysteren van Sunte Gheerde, rueren- de, ende daeren boven inghecomen is gheweest, ende die slitinghe noch niet en heeft willen voldoen, soe verbiet hoer die raet onse stat en- de een mile vander stat te bliuen ewelic op hoer lyf (209).*

— Want Jacob Fransz *der Heren arve van Sunt Marien boven ontwaringhe ende huere gheeert ende besayet heeft, soe sel hi komen in hemde ende in broeke met enen bloten sweerde inder hant te hebben, ende bekennen syn lyf verboert te hebben, ende bidden om ghenade ende verghiffenisse, ende men sel hem ghenade*

doen, behoudelick, dat hi sine broeke verborghen sal, ende sinen wilcoer over den rade doen, eer hi wt der vanghenisse comen sal, ghelyc hem die raet oversleten heeft (210).

1466. Want Edewaert wt Schottlant boven 's raets overdracht ghebeden heeft sonder teycken, daerom verbiet hem die raet onse stat een jaer lanc naestcomende (211).

1467. Want Robbrecht Jackson, diener des Hertoghen van Excester, boven onser stat gheleide, enen engelschen coepman gheslegghen ende ghewont heeft, daerom verbiet men hem onse stat ende een mile vander stat te bliven ewelic op syn lyf (212).

— Want Adrian, Reyer Willemsz, veel ondoechdelike hantieringhe teghen sine ouders ende oec jeghens anderen luden ghehadt heeft ende oec onsen borghermeysteren vanden Viven, daer hi in onser stat dienste was, smelike woerden ghehadt heeft ende ghegheven, daerom heeft hi een half jaer op Sint Katrinen poerte inden paradyse ghelegghen, ende die raet verbiet hem onse stat vyf jaer lanc naestcomende ende een mile vander stat te bliven op syn lyf (213).

1468. Want Joffer Kateryn, des pastoers meecht van Delft, veele ondoechdelike ende ontamelike woerden, op goede vrouwen ghesproken heeft, daerom verbiet hoer de raet, out ende nywe, onse stat (214).

— Want Foys, Gherit van Culenborchs amme, syn kynt verlegghen ende verswymt heeft,

- daerom verbiet hoer die raet onse stat ende een mile vander stat te bliuen ewelic op hoer lyf (215).
1468. Want Morigen, Cornelis die Hoefslaghers wyf, Cornelis hoeren man *mit onbetameliken ende onnatuerliken saken befaemt heeft, hetwelk sy geloghen ende versiert heeft*, daerom heeft sy op de kaec ghestaen, ende men heeft se binnen de stat aen beiden siden der graften, out ende nywe, omghevoert metten steen aen horen hals, ende die raet verbiet hoer onse stat ende een mile vander stat te bliuen ewelic op hoer lyf (216).
- Want Jan vander Meye *ondoechdeliken ende onredeliken gehantiert heeft* Lysgen, Lamb. Henrics *meecht in Galissen*, daerom verbiet men hem onse stat ende een mile vander stat te bliuen v jaer lanc naestcomende op syn lyf (217).
1469. Want Gheertgen *opt Sant, gheheten inde wanderingh Grootmoeder, ondaften binnen onser stat bedreven heeft*, daerom verbiet men hoer onse stat ende een mile vander stat te bliuen x jaer lanc naestcomende op hoer lyf (218).
- Want een vroungen *opt Sant, gheheten inde wanderinge Hanneboen, vele ondaften ende onsedicheit binnen onser stat bedreven heeft*, daerom verbiet men hoer onse stat ende een mile vander stat te bliuen v jaer lanc op hoer lyf (219).
- Want een vroungen, *gheheten inde wanderinghe Hannitge bider Moeder Gods, oec onsedicheit bedreven heeft binnen onser stat*, daerom verbiet hoer die raet onse stat thien jaer (220).
- Want Herbern Koec, *onser stat vive ende*

dienres, daer si ghecomen syn bi nachte, om hem te becoeren in sinen huse van dobbelen na onser stat rechten, aenghegrepen ende gehouden heeft, daerover een onser stat vive ghewont is, daerom is hi alhier ghecomen in hemde ende in broeke mit enen bloten sweerde, ende sel kennen syn lyf verboert te hebben ende bidden den rade verghiffenisse ende gracie, ende hi sel bi sonnenschine van desen daghe wt der stat gaen ende een mile vander stat bliven ewelic op syn lyf (221).

J. J. DODT v. FL.

(Het vervolg hierna.)
